

學問之事及時政得失皆所陳啓下情得通固宜頻數御之而
暑日寒時則依晚朝啓例為之當矣但今日候汭寒殿內深陰
廣闊恐自 上感冒也常時於丕顯閣為召對矣若數御晝夕

講於丕顯閣則於學問之道得矣荅曰予本欲勉於學問而氣
稟虛弱冒寒觸暑則氣不得安丕顯閣則非如思政之法殿中
對夜對則可為也晝夕講則自古不為之地恐難開新例也雖
為召對夜對學問則一也○三公啓曰元子已解讀書宜出輔
養宰相頻數進見何如荅曰元子近日雖暫讀千字孝經時未
經大疫當加斟酌為之○金羅道長城正兵崔水溉家前有大
石平鋪於地者忽然有聲若伐木之響良久不止須臾全體浮
舉去地二尺旋即頽落其聲如枯木摧折下端背面長二尺許
廣八尺許片片浮碎○自辰時至巳時濁氣蒙冒夜南方如火
氣流星出中台星下入五車星大如拳尾長五六尺許色赤
閏十一月壬戌朔禮曹啓曰長城石變近古所無至為駭愕請
令弘文館考古史傳曰如啓○上御夜對○江原道觀察使尹